

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq Naalakkersuisut matumuuna saqqummiuppaat.

Namminersorlutik Oqartussat siunnersuummik uannga akuersinissaannut Inatsisartut aalajangiiffigisassaattut siunnersuut: Akiligassatigut isumaqatigiissutit pillugit inatsisip Kalaallit Nunaanni atuutsinneqalernissaanik peqqussut

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Aalajangiiffigisassatut siunnersuutip imarisaa

Aningaasaatit, pigisallu aningaasanik nalillit pillugit inatsiseqarnerup iluani akiligassarsilluni pisineramik inatsit Kalaallit Nunaanni atortuulersitaaneramik peqqussut nr. 33, 27. januar 1986-imeersoq nutartissallugu peqqussut siunertaqarpoq.

Danmarkimi malittarisassanik atuuttunik Kalaallit Nunaanni – Kalaallit Nunaanni pissutsinut naleqqussakkanik – malittarisassaqaarnissaa, inatsisissatut siunnersuutitigut qulakkiissallugu siunertaavoq. Akiligassatigut isumaqatigiissutini akiligassiisartut, atuisullu akornanni pitsaanerumsumik, ullutsinnullu naleqqunnerumsumik Kalaallit Nunaanni malittarisassaqaarnissaa kiisalu atuisut akiligassatigut isumaqatigiissusiortillugit pitsaanerumsumik illersorneqaarnissaat pingaarnertut siunertaavoq. Akiligassiisartoq atuisumut akiligassiilluni imaluunniit akiligassiiniarluni siumut neriorsuuteqarluni isumaqatigiissutit, akiligassarsinermi isumaqatigiissutinut inatsimmi ilaatinneqarput.

Akiligassarsinermi isumaqatigiissutinut inatsimmik nutarsaanerup kingunerisaanik, annikitsut ilanngunnagit soorlu ilaatigut pigisanik aalaakkaasunik qularnaveeqqusiilluni taarsigassarsinerit aamma piffissami sivikitsumi akilersugassanik taarsigassarsinermi isumaqatigiissutit ilaat, inatsisip atuuffia atuisut akiligassarsinerinut aamma atortariaqakkanut taarsigassarsinernut tamanut siammassaaq. Assersuutigalugu Kalaallit Nunaanni niuerfinni siunissami SMS-ikkut taarsigassarsisitsinnaanerit assigisaallu sioqqullugit sillimaffigineqarsinnaalissapput.

Akiligassarsilluni pisinermi inatsimmut massakkut atuuttumut sanilliullugu, isumaqatigiissusiordermi annikitsortai ilanngullugit paasissutissat amerlanerusut paasissutissiissutigineqartussaammata, akiligassiisup paasissutissiisussaataitanera akiligassarsinermi isumaqatigiissutinut inatsisip annertuumik annertusivaa. Assersuutigalugu akiligassiinermi ukiumut aningaasartuutit procentinngorlugit paasissutissiissutigineqartussaassapput. Taassuma saniatigut akiligassarsinermi isumaqatigiissummi

piumasaqaatinik atuisut sioqqutsisumik naliliinissaminnut piffissaqarnerulersillugit, akiligassarsinermi isumaqatigiissutitut pituttorsimasunik isumaqatigiissusiortoqartinnagu atuisoq piffissaagallartillugu arlalinnik paasissutissinneqartussaataaner ilanngunneqarpoq.

Inatsit malillugu akiligassarsinermi isumaqatigiissutinik, ullut 14-it iluini peqqissiminissamut periarfissaq aamma ilanngunneqarpoq. Tamanna pillugu eqqarsaatigilluarnagu isumaqatigiissutigineqarsimasunik, eqqarsaatigilluareerlugu pituttorsimaffigerusunngisaminnit atuisut aningaasartuuteqarfiunngitsumik tunuarnissaminnut periarfissaqarput.

Ilutigisaanik atuisoq akiligassissallugu tatiginarnersoq inuussutissarsiutilik akiligassiiniaq, nalinginnaasumik siumut naliliisarnissaanik piumasaqaat ilanngunneqarpoq.

Tamanna pillugu inatsimmik nutarterineq atuisunut annertuumik iluaqutissanngortussaavoq, atortariaqakkanullu taarsigassarsinerit naleqqutinngitsut sioqqutissallugit.

Peqqussutissatut missingiut kapitalinut arlalinnut agguataagaavoq, tassanilu ilaatigut atuuffia, nassuiaatit, akiligassiisup paasissutissiisussaataaner, peqqissimisinnaatitaaneq, akiligassarsilluni pisinermi atuisinnaatitaalluni qularnaveeqquseeqqusinnginneq, pingaarnertut immikkut piumasaqaatit, paasissutissiisussaataanermik unioqqutitsineq, atuisup akiliutai, atuisup akiliinngitsoorneri, akiligassa qarfimmik taarsiineq, piginnittuunermut nangaassutitalimmik pisineq, inuussutissarsiutillit akornanni pisinerit il.il. malittarisassiunneqarlutik.

Akiligassarsinermi isumaqatigiissutitut inatsit Danmarkimi atuuttoq tunuliaqutaralugu peqqussutissatut siunnersuut suliarineqarpoq. Kalaallit Nunaanni pissutsit aamma malittarisassat eqqarsaatigineqarlutik, naleqquttutut nalilerneqartillugu malittarissat, oqaasertallu naleqqussarneqarput.

Aningaasaatit, pigisallu aningaasanik nalillit pillugit inatsiseqarnerup annertunerusumik nutarterneqarnissaatut pilersaarutaasumut, inatsimmut allannguutissatut siunnersuutigineqartut ilaapput.

Peqqussutip imarisaa annertunerusumik paasisaqarfigiumagaanni, eqqikkaaneq ilanngussatut ilanngussaq innersuussutigineqarpoq.

Inatsit atuuttoq

Akiligassarsinermi isumaqatigiissutitut inatsimmut nalunaarut nr. 817/2019, kingusinnerusukkut allannguuteqartumiittoq Kalaallit Nunaannut atortuulersinneqarnikuunngilaq, naak tamanna pingaarnertut inatsimmi kiisalu kingorna inatsimmut allannguutini tunngavissaqaraluartoq. Akiligassarsilluni pisinermi inatsit nutaanngitsoq 1982-imeersoq Kalaallit Nunaannut atuuppoq.

Akiligassarsilluni pisinermi inatsimmut pingaarnertut inatsit nr. 275/1982-imeersoq, akiligassarsilluni pisinermi inatsisip Kalaallit Nunaannut atortuulersinneqarnissaa pillugu kunngip peqqussutaatigut nr. 33, 27. januar 1986-imeersukkut Kalaallit Nunaannut atortuulersinneqarpoq, kisianni tassani Kalaallit Nunaanni immikkut pissutsit, matumani pingaartumik inatsit naapertorlugu oqartussat sorliit sulianik suliaqartussaataitanerilannullugit, allannguutigalugit.

Pisortanut aningaasatigut allaffissornikkullu kingunerisassai

Peqqussutissatut missingiut pisortanut aningaasaqarnikkut, allaffissornikkullu kingunissaqanngilaq. Aningaasaatit, pigisallu aningaasanik nalillit pillugit inatsiseqarneq, isumaqatigiissutinut inatsimmut ilaasoq sulil Danmarkip suliaqartuussatit erseqqissaatigineqassaaq.

Namminersortunut aningaasatigut allaffissornikkullu kingunerisassai

Inuussutissarsiortut nalinginnaasumik ersarinnerusumik piumasaqaatinik, atuisunut isumaqatigiissusiornermi atussallugit ersarilluinnartumik naleqqutinngitsunik atuisut akiligassinneqarsinnaanerilinnit inatsisissatut siunnersuut allannguutitaqarpoq.

Innuttaasunut aningaasatigut allaffissornikkullu kingunerisassai

Peqqussutissatut siunnersuut innuttaasunut aningaasatigut, allaffissornikkullu kingunissaqanngilaq. Taamaakkaluartoq innuttaasunik ullumikkuminngarnit illersuinerusunik, siunnersuut aalajangersagartaqarpoq.

Naligiissitsinermut kingunerisassai

Siunnersuut naligiissitsinermut kingunissaqanngilaq.

Tusarniaaneq

Tamanut ammasumik tusarniaaneq Justitsministeriaqarfiup isumagaa, tassanilu Kalaallit Nunaanni oqartussat attuumassuteqartut akuutinneqarlutik. Siunnersuut 12. november 2025-mit, 10. december 2025-p tungaanut tamanut tusarniutigineqarpoq.

Ilanngussat:

- 1) Akiligassatigut isumaqatigiissutit pillugit inatsisip Kalaallit Nunaanni atuutsinneqalernissaanik peqqussutit eqikkarnera.
- 2) Uunga siunnersuut: Akiligassatigut isumaqatigiissutit pillugit inatsisip Kalaallit Nunaanni atuutsinneqalernissaanik peqqussut.
- 3) Tusarniaaneq pillugu takussutissiaq oqaaseqaatitalik.